



Республикалық жастар газеті

# Ақмешіт ЖАСТАРЫ

...Мен жастарға сенемін!



Мағжан



№17 (554)  
25 сәуір,  
2024 жыл

Газет 2013 жылдың қыркүйек айынан бастап шығады



## «ШЫНЫ ЖАРТАС»

### ШЫҢЫНДАҒЫ ШЫНАРЛАР

Нар тұлға, батыл, қайратты деген сөздерді естігенде көз алдымызға ер адамдардың бейнесі елестейді. Алайда бір қолымен бесікті, екінші қолымен әлемді тербеткен әйел затының жеткен жетістіктері туралы айта бермейміз. Бұл мақаламызда «шыны жартастың» шынына бірінші болып жеткен шынарлар туралы сөз қозғайтын боламыз. Себебі Қазақстанның еңбек нарығында 4,3 миллион әйел бар екенін білдік.

#### ЖАҢА ҰҒЫМ ҚАЛАЙ ПАЙДА БОЛДЫ?

Бұл ұғым 2005 жылы Эксетер университетінің қабырғасында білім беретін ғалымдар Мишель Райан мен Александр Хасламның арқасында қолданысқа енді. Олар “басшылықта әйел болса, ол құрдымға әкеледі” деп білген ғалым Элизабет Джадждың тұжырымын теріске шығарған. Элизабет “тізгінді өз қолына алған әйел мамандар компанияға зиянын тигізеді, сондай-ақ олардың кесірінен қаржылық көрсеткіштер төмендейді және фирма пайдасын жоғалтады” деп пайымдаған. Алайда Мишель мен Райан жүздеген компания арасында зерттеу жүргізіп, мынадай теория ұсынған: компания құрдымға кеткен кезде барып, әйел адамдарды басшылар қатарына қосады. Психологиялық тұрғыдан алып қарасақ, әйел адамды кінәлі етіп көрсету ұтымдырақ. Мұның бірнеше аспектісі де бар. Ғалымдардың айтуынша, әйел адам – ер адамның келтірген залалдарын түзетуге бейімделген. Себебі олар – төзімді, өзін тындатып және өзгеге де құлақ асуға бейім. Сондай-ақ кез келген жағдайда жол тауып, екі жаққа да тиімді шешім шығарып, компромиске келе алады. Бұл тұрғыда ер адамдар көбіне бір жақты ойланатыны рас.

2



## ІТ ЖОБАЛАР

### АВТОРЛЫҚ ДЕҢГЕЙДЕН ӘРІ АСПАЙ ЖАТЫР

Елімізде ІТ саланы, оның ішінде робототехниканы дамыту өте маңызды. Осы орайда робототехника саласында бірқатар жобаны сәтті жүзеге асырған Қорқыт ата атындағы Қызылорда университеті, “Компьютерлік бағдарламалар” бөлімінің басшысы, ғалым Арыстанбек Тұяқбаевпен емен-жарқын әңгіме өрбіттік.

– Арыстанбек аға, ғаламды жаулап алған цифрлық сала бойынша аймақта алғашқылардың бірі болып нәтижелі жұмыс атқарған білікті мамансыз. Қазір қандай жобамен айналысудасыз?  
– Бүгінде қай саланың да болашағын цифрландырусыз елестету мүмкін емес. Елімізде көптеген жұмыс атқарылууда. Өйткені дамыған елдерге жету үшін тоқтаусыз еңбек қажет. Бірақ көп жағдайда ІТ жобалар авторлық деңгейден әрі аспай жатыр. Басым бөлігіне мемлекеттік қолдау қажет. Қазір үш бағытта еңбек етудемін. Алғашқысы, e-univer платформасы. Бұл – университеттегі оқытушылар мен студенттерді бір-бірімен байланыстыру, жұмыс процесін автоматтандыруға арналған жүйе. Екінші бағыт – виртуалды зертхана жасау.

4-бетте

## БӨГЕННЕН БҮГІНГЕ ДЕЙІНГІ БОЛМЫС

Бүгін Нұрлан Нұрмахановтың туған күні! Ердің жасы елуге келіп жатыр. Бұл есім Сыр өңірі журналистикасында ойып тұрып орын алады. Студент кезінен қолынан қаламын тастамай, Қызылордадағы ақпарат құралдарымен байланыс құрып, әр жанрда материал жазып, оқырманның жүрегінен орын тапты. Оның шағын ақпараттан бастап корреспонденция, репортаж, сұхбаттары өз алдына, проблемалық және сыни мақалалары көптің есінде. Ал қаламынан туған фельетондары мен сатиралық шығармалары келенсіз жағдайлардан жиіркендіру арқылы қоғамды тәрбиелеуге бағытталғанын бағамдау қиын емес.

Нұрлан Көбегенұлының журналистикаға қадам басқанына отыз жылға жақындап қалды. 1993 жылы Қызылордада оқу іздеп келген оның алғашқы туындысы облыстық газетте

1994 жылы жарық көрді. Сол жылы радиодан корреспонденциялары, мақалалары көпшілікке жетті. Оқуын тәмамдап, қолына диплом аламын дегенше тыным таппаған қалам-

гердің журналистикадағы қолтанбасын, бүгінгі жетістікке жеткен қадамдарын үзеңгілестері жақсы біледі.

3-бетте



Жанарыс ТҮБЕКБАЕВ:

## РЕЗИДЕНТТЕР ӘЛЕМДІК НАРЫҚҚА ШЫҚТЫ

Kuzylorda Hub орталығының резиденті атану үшін бізге өтінім жіберіп, іс-шаралар мен бағдарламаларға қатысу қажет. Өтінімдер ерікті түрде [www.kuzylordahub.kz](http://www.kuzylordahub.kz) сайтында немесе [kuzylordahub](https://www.instagram.com/kuzylordahub) инстаграм парақшамызда қабылданады. Іріктеу критерийлері жоқ, біз кез келген идеяға ашықпыз. Бастысы, қатысушының жігері мен ынтасы.

5-бетте

## МОПЕД. ҚАУІП СЕЙІЛЕР ЕМЕС

Қала ішінде көліктердің арасынан арналыса өтіп, тапсырысты жеткізуге асыққан, мопед жүргізушілерін көп көретін болдық. Жүйткіген қос дөңгелектеріге қатысты сан алуан пікір айтылып жүр. Көше қозғалысына енді ғана араласа бастаған бұл көлік түріне сұраныс артқан. Заң аясында белгілі ережелер мен шектеулер де бар.

Мопед – көлемі 50 текше см-ден аспайтын мотормен қозғалысқа түсетін көлік. Екі немесе үш дөңгелекті, ал ең жоғары конструктивті жылдамдығы сағатына 50 шақырым болады. Мопедке аспалы қозғалтқышы бар велосипедтер және осындай сипаттағы басқа көлік құралдары жатады.

Күнделікті қаржы үшін қолданысқа ыңғайлы әрі жанар-жағармайды да көп қажет етпейтін мопед қарапайым халық үшін «құтты көлік» болып тұр. Мопед мінген жүргізушілердің дәрежесі велосипед айдаушылармен тең болғандықтан барар жеріне тез жету үшін арнайы жолақты басып өтіп, автомобиль жолдарын пайдаланады. Кептелісте кедергісіз қозғалатын бұл көлік түріне төнер қауіп те аз емес.



2











# ТАЕКВОНДО. ТУ КӨТЕРГЕН ТҰЛҒА

Таеквондо тарихы тым тереңде. Ал қазақ жерінде 1991 жылдан бастау алады. Оның негізін қалаған халықаралық шебер, қара белдіктің 6-шы дан негері, әлемге әйгілі спорт шебері Мұстафа Өзтүрік болды. Біз бүгін осы ұлы тұлғаның өнегелі өмір жолына көз жүгірткенді жөн санадық.



Түлкіев, Несіп Жүнісбаевтар еді. Кейін осы ел ағалары таеквондонның елімізде дамуына көп еңбек сіңіргені белгілі.

1990 жылы 26 маусымда Алматы қаласындағы Орталық циркте кездесу ұйымдастырып, Мұстафа Өзтүрікті қазақ жұртшылығына алғаш таныстырды. Қазақ халқы шетелде өзінің Мұстафадай ұлы бар екенін білді. Кездесу халық санасына үлкен сілкініс берді. Осы кезден бастап елімізде шығыс жекпе-жегінің дамуы күрт өседі. Кейін Мұстафа Өзтүрік өзінің Түркиядағы шәкірттерін ертіп келіп, «Балуан Шолақ» атындағы сарайда таеквондо өнерін көрсетті. Осы қойылым кезінде қазақстандық екі спортшыға таеквондодан қара белдіктің I даны атағы берілді. Олар Қазақстанға еңбек сіңірген суретші, «Дарын сыйлығы» мен «Ленин комсомолы сыйлығының» лауреаты Бексейіт Түлкіев пен ғалым әрі мемлекет қайраткері, Қазақстанның Монғолия Республикасы елшілігінде жауапты қызмет атқаратын Асқар Абдрахманов болатын. Бұл аталған екі спортшы да бұрын-соңды қаратэмен шұғылданған адамдар еді. Сол күннен бастап Қазақстанда таеквондо (WTF) спорты кеңінен етек жая бастады.

1991 жылдың жазынан бастап Алматы қаласындағы Республикалық оқушылар сарайында тұңғыш рет таеквондо (WTF) спортынан үйірме ашылды. Ол мектепке Асқар Абдрахманов жетекшілік етті. Осы жылдың 15 қыркүйегінде мектепке аға бапкер болып Исатай Қабеков келді. Сонымен қоса Дихан Ақаев, Қайрат Қырғызбаев, Серік Рысбаев секілді басқа да бапкерлер осы спорттың дамуына атсалысты. Республиканың бірқатар облысында таеквондо үйірмелері ашыла бастады. Жамбыл облысында Бәйділдә Жұмабеков, Оңтүстік Қазақстан облысында Шадиар Қондыбаев, Қызылорда облысында Қанат Ғизатов, Солтүстік Қазақстан облысында Серік Рысбаев, Атырау облысында Қабибек Мұхитов таеквондодан өз үйірмесін ашты. Ал ең бастысы 1992 жылы Қазақстан Республикалық таеквондо федерациясы (WTF) құрылды. Оның құрылтайшылары Алматы қалалық, Жамбыл облыстық, Оңтүстік Қазақстан облыстық, Қызылорда облыстық, Солтүстік Қазақстан облыстық және Атырау облыстық федерациялары еді. Федерацияның тұңғыш президенті болып Бексейіт Түлкіев сайланды.

1992 жылы тұңғыш рет Қазақстан чемпионаты ресми түрде ұйымдастырылды. Осы жылдың қыркүйегінде Түркияда халықаралық турнир өтіп, бұл жарысқа тұңғыш рет Қазақстанның таеквондошылары қатысты. Жарыстың қорытындысында Қайрат Қырғызбаев пен Сұлтанмахмұт Шокпытов чемпион атанды. 1992 жылы Мұстафа Өзтүрік Қазақстанның азаматтығын алды. Сол жылы көктемде Қазақстан таеквондо федерациясы Бүкіләлемдік Таеквондо федерациясына мүше болды.

1993 жылы Алматы қаласында қатарынан екі бірдей мектеп ашылды. Олар «Исатай» (Исатай Қабеков) мектебі мен «Мұстафа Өзтүрік мектебі» (Қайрат Қырғызбаев) болды. Сол жылы тамыз айында Мұстафа Өзтүрік пен Бексейіт Түлкіев бастап барған ұлттық құрама командасы Нью-Йоркте өтетін әлем чемпионатында тұңғыш рет бақ сынады.

Осы кездегі ұлттық құрама командасының мүшелері Сұлтанмахмұт Шокпытов, Мұрат Темирәлиев, Анвар Усенов, Имантай Абеєв, Ғани Абдуғаббаров, Саен Төлембетов, Малик Шаншарбеков, Нұрлан Чигитаев болған. Команданың бас жаттықтырушысы Максұт Нарбаев пен жаттықтырушылары Жақсылық Жақсыбеков және Дихан Ахаев болды. Қорытындысында Нұрлан Чигитаев 5 орынға ие болды.

Ал 1994 жылдың ақпан айында Қазақстан құрама командасы АҚШ-тың Колорадо Спрингс қаласында өткен АҚШ-тың ашық чемпионатына қатысты. Сол кездегі Қазақстан құрама командасының мүшелері Сұлтанмахмұт Шокпытов, Мұрат Темирәлиев, Забиболла Амирбеков, Вячеслав Пак, Имантай Абеєв, Ғани Абдуғаббаров болды. Команда жетекшілері – Мұстафа Өзтүрік пен Бексейіт Түлкіев, Дихан Ахаев.

1995 жылы наурыз айының 15-де қазақтың біртуар ұлы Мұстафа Өзтүрік дүниеден өтті. Бұл – халықтың қабырғасын қайыстырған қаза еді.

Қуаныш ҚУДАЙБЕРГЕНОВ,  
әдіскер

Мұстафа Өзтүрік 1954 жылы 23 қарашада Стамбулда туып, 1975-1980 жылдары Тайбэй халықаралық саясат университетінде халықаралық журналистика мамандығы бойынша білім алған. Аңыз адам осы университетте оқып жүріп таеквондомен шұғылданады. Кейін ірі халықаралық жарыстарда жеңімпаз атанып, мұсылман халықтары арасында тұңғыш болып таеквондодан «Халықаралық шебер» дәрежесіне жетеді. Оқуын аяқтаған соң Мюнхен қаласында полицейлер мен ерекше міндет атқаратын арнайы қызметкерлерді даярлайтын бапкерлік қызметке шақырылады. Сонымен қоса Мюнхен қаласында өзінің жеке мектебін ашады. Мұстафа Өзтүріктің таеквондо мектебі 1983 жылы Стамбул қаласында да бой көтереді.

Кейін 1983 жылы қазан айында Копенгаген қаласында өткен әлем чемпионатында Мұстафа Өзтүріктің шәкірті түркиялық Йылмаз Хелвагиоглы алтын алқа, тағы да екі шәкірті қола жүлдеге ие болады.

1990 жылы маусым айында Қазақстан ЛКЖО ОК-нің шақыруымен Қазақстанға келді. Оның келуіне ұйытқы болған ел ағалары Иманғали Тасмағамбетов, Серік Абдрахманов, Талғат Тименов, Төлеген Мұхамеджанов, Бексейіт



## ЖЕҢІСІМЕН ҚҰТТЫҚТАДЫ

Мемлекет басшысы Қасым-Жомарт Тоқаев әлемдік теннис турнирінде топ жарған қазақстандық спортшыны жеңісімен құттықтады.



«Елена Рыбакинаны Штутгартта өткен теннис турнирінің жеңімпазы атануымен құттықтаймын. Қазақстанның бірінші ракеткасы биылғы маусымда осымен үшінші турнирде жеңіске жетіп отыр. Бұл – үлкен жетістік. Даңқты теннисшімізге толағай табыс тілеймін!» – деп жазылған Мемлекет басшысының Instagram парақшасында.

## БИЛЕТ САТЫЛА БАСТАДЫ

Париждегі жазғы Олимпиада ойындарына 250 мың жаңа билет сатылымға шықты.



Ол дубірлі доданың басталуына 100 күн қалуына орайластырылған. Билеттердің жартысынан астамының құны 100 еуродан төмен. Жалпы спорттық шараның 10 миллиондай билеті сатылымға шыққан. Олардың бағасына қатысты көп сын айтылып келді. Өйткені арзандарының дені оқушылар, волонтерлер мен мүмкіндігі шектеулі жандарға алдын ала тапсырыспен алынып қойылған.

## ЖАҢА БАПКЕР ТАҒАЙЫНДАЛДЫ

OG киберспорт ұйымы Counter-Strike 2 командасына жаңа бас бапкер тағайындады.

Бұл қызметке французиялық бапкер және бұрынғы ойыншы Ламберт Lambert Приггент тағайындалды. Ресми хабарландыру клубтың әлеуметтік желілерінде жарияланды.



Ламберт бапкерлікті 2024 жылдың қантарында OG-де бас бапкер Каспер Ruggah Дьюдің көмекшісі болған кезде басталды.

Қазіргі OG құрамы:  
– Масей FIKU Миклаш;  
– Брам Nexius Кампана;  
– Нильс k1to Грун;  
– Никита HeavyGod Мартыненко;  
– Ламберт Lambert Приггент (бапкер).

## КАРАТЭШІЛЕР СЫР ЕЛІНДЕ БАҚ СЫНАДЫ

«Евразия» спорт кешенінде Киокушинкай-кан каратэден Қазақстан Республикасының кубогы өтті. Аталған жарыс Азия чемпионатына іріктеу мақсатында ұйымдастырылды. Жарысқа еліміздің 16 облысынан 600-ден астам спортшы қатысты.

Жекпе-жек облыс әкімінің бірінші орынбасары, Қазақстан Республикасы Ұлттық киокушинкай-кан каратэ федерациясының Қызылорда облыстық филиалының президенті Данияр Жаналинов ашып, халқымыздың ежелгі жауынгерлік рухын көтеруде үлкен маңызы бар аталған спорт түрін дәріптеу – бүгінгі барша спорт сүйер азаматтардың мерейлі міндеті екенін атап өтті.

Сонымен қатар, Қазақстан Республикасы Ұлттық киокушинкай-кан каратэ федерациясының президенті Омархан Өксікбаев өз құттықтауын жеткізіп, барша қатысушыларға сәттілік тіледі.

Жарыс айтарлықтай жоғары деңгейде ұйымдастырылды. Балалар, жасөспірімдер, жігіттер арасындағы жекпе-жек те, қыздар арасындағы текетірес те тартысты өтті. Турнир жас спортшылар үшін ғана емес, олардың ата-аналары үшін де эмоцияға толы болды. Олардың бірі перзентіне мотивация берсе, бірі сөзбен қолдады.

Спортшылар ката және кумитэ жүйелерінен сынға түсті. Қазақстан кубогында астаналық спортшылар жоғары нәтиже көрсетті. Олардың еншісінде барлығы 54 (22 алтын, 15 күміс, 17 қола) медаль бар.

Ал Ақмола облысының командасы 18 (8-7-3), Ұлытау облысы 21 (7-4-10) медаль еншіледі.

Сондай-ақ татами төріндегі тартыста дан-тест емтиханынан өткен спортшыларға қара белбеу табысталды.

Облыс атынан қатысып, жеңіс тұғырынан көрінген спортшыларға келсек, ката бағдарламасы бойынша +18 жас аралығында Мәди Мейрамбек I орынды иеленсе, Әли Мейрамбек II орынды еншіледі. Осы спортшыларымыз кумитэ бағдарламасы бойынша да жүлделі III орынға тұрақтады. Қыздар арасынан Балнұр Серік пен Еңлік Жанатова да III орынды жеңіп алды. Жаттықтырушылары – Б.Мұханов. Қызылорда құрамасы осы жарыс бойынша 8 жолдамаға ие болды.

Мақсат ҚОСЫМБАЕВ



